

DOMENIE XXVIII «VIE PAL AN»

Jutoris pe Liturgjie

Domenie, ai 11 di Otubar dal 2020

*Alore Gjesù ur vierzè la ment par lâ a font des **Scripturis** (Lc. 24, 45)*

Vite - Bibie - Popul - Glesie

+ *O vin di svicinâsi a la Peraule di Diu partint de sapience e des tribulazions dai puars (*). Di fat, Diu al à rivelât se stes ai puars e lôr a son in grât di interpretâ chê peraule rivelade. Gjesù lu dîs cun scletece:*

Ti benedis, Pari, Signôr dal cîl e de tiere, che tu âgnudis platadis chestis robis ai sapients e ai inteligjents e tu ur es âs palesadis ai sempliçs. Sì, Pari, parcè che cussi ti à plasût a ti (Mt 11, 25-26).

+ *Par secui si à pensât che i sempliçs e i ignorants no rivassin a capî te maniere juste la Bibie. Vuê o sin convints propit dal incontrari e chest al ven ricognossût ancje fra competents unevove in alt. Di fat tal document "Interpretazion de Bibie te Glesie (1993), IV, C 3" de Pontificie Comission Bibliche, o lein:*

"Al è motîf di grande contentece viodi la Bibe tes mans di personis umilis e puaris; lôr tal interpretâ e rindi atuâl la Bibie a puedin dânus une lûs vive che no si cjate te sience esegjetiche e teologjiche tant sigure di sé. E chest sei dal pont di viste spirtuâl che de esperience di vite.

Dal libri di Carlos Mesters: Far ardere il cuore - Ed. Messaggero Padova, p. 5.

(* *puars: culi o podin intindi ancje la nestre int e comunitâts di paisuts e borgadis che ormai cence nissune prospietive economiche, politiche e religjose a stan lentamentri murint.*

* * *

In chestis ultimis domeniis (XXV - XXVI - XXVII) o vin scoltadis lis parabolis dai operaris clamâts a lavorâ a oris diferentis e paiâts compagn, dai doi fîs cul "sì" che al devente "no" e il "no" che al devente "sì" e chê dai contadins che a copin il fî dal paron dal vignâl. Vuê al è invezit il grant gustâ nuviçâl dal fî dal re li che i invidâts no si presentin e il re al ordene: Lait pes croseris des stradis e clamait a gnocis ducj chei ch'o cjatarês, bogns e triscj."

Chestis parabolis a àn il stes cjaveç: Gjesù al ven rifudât dai socestants dal popul di Israel intant che i paians, i piçui, i pecjadôrs i vierzin il lôr cûr. Al è chest, pes primis comunitâts di ebreos e paians miscliçâts insiemi, un fat che al sconcerte; resonant al sa dal impussibil e nol è acetabil, ancje se di fat al sucêt.

Ma, ancje noaltris vuê o sin metûts sot il judizi sevêr di chestis parabolis; lôr nus domandin di sielzi fra une tradizion religjose che no disturbe e la novitât di Crist che e disturbe, fra une glesie e societât fondadis ancje su ideologiis che no tegnin e la grande esigjence di une conversion a un cambiament di epoche; tocje meti vin gnûf in bufulis gnovis; se no il vin al fâs spreçâ lis bufulis e tal ultin si piert vin e bufulis". (Mc 2, 22). E dut chest par che Crist nol vebi a tratânus di fals! Int false!

Di fat: ur diseve ancje a lis folis: "Cuant che o viodês un nûl che al va sù di soreli a mont, o spesseais a dî: E ven la ploie, e cussi al sucêt. Cuant che invezit al svinte il siroc, o disês: Al ven

cjalt, e cussì al sucêt. Fals! O sês bogns di induvinâ il timp che al fasarà e cemût mai no rivaiso a capî chest timp di cumò? Parcè no judicaiso di bessôî ce che al è just? (Lc 12, 54-57).

Lis parabolis di chestis domeniis, nus domandin propit une responsabilitât in cussience, un cambiament radicâl, une autentiche conversion.

Antifone di jentrade

Sal 129,3-4

Se tu tegnîs cont, Signôr, de tristerie, cui rivaraial a parâsi?
Ma li di te si cjate misericordie, Diu di Israel.

Colete

La tô gracie, Signôr, ti preîn,
ch'è cjamini simpri denant di nô e nus compagni,
e nus fasi jessi saldo impegnâts intes oparis.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Is 25,6-10

Il Signôr al prontarà un gustâ, e al suiarà lis lagrimis sun dutis lis musis.

La vision dal profete e je plui che grande, plui che bieles, plui che golose; ma e je ancje utopie te nestre vicende dal Covid-19; l'incontrari di ce che nus sta sucedint. Di fat, se o rivin a cjapâle verset dopo verset o podaressin cuasi dî che o stin slontanantsi di une tâl realtât dal avignî.

Al è ancje chest motif di riflession e timp di ponisi domandis, parcè che. Fals! O sês bogns di induvinâ il timp che al fasarà e cemût mai no rivaiso a capî chest timp di cumò? Parcè no judicaiso di bessôî ce che al è just?

Dal libri dal profete Isaie

Il Signôr des schiriis al prontarà
par ducj i popui, sun cheste mont,
un gustâ di cjars grassis,
un gustâ di vins vieris,
di cjars plenis di medole,
di vins di prime siele.
Sun cheste mont lui al tirarà vie
il vèl metût su la muse
di ducj i popui,
e la coltre slargjade sun dutis lis gjernaziis.
Al fiscarà par simpri la muart,
e il Signôr Diu al suiarà lis lagrimis
sun dutis lis musis,
e al gjavarà la vergogne dal so popul
sun dute la tiere,
parcè che il Signôr al à fevelât.
E si disarà in chê dì:
«Ve il nestri Diu,
al è in lui ch'ò vin sperât par che nus salvàs!
Chest al è il Signôr, o vin sperât in lui,
gjoldin e indalegrinsi de sô salvece.
Parcè che la man dal Signôr si poiarà sun cheste mont».
Peraule di Diu.

SALM RESPONSORIÂL

dal Salm 22

Il salmist midiant de sô esperience di vite nus presente la guide - il Signôr al è il gno pastôr - e la strade - mi mene par trois di justizie - par rivâ li che i passons a sverdein,... li che a son aghis frescjis,... li che tu prontis denant di me une taulade.

Se o vin par guide il Signôr, ancje s'ò ves di cjaminâ par une foranate scure, no mi mancjarà nuie.

Al scrîf l'Apuestul: Benedet sejal Diu,... Diu di ogni confuart che nus confuarte in ogni tribulazion... par che o podìn confuartâ... cun chel confuart che ancje nô o vin di Diu (cf. 2 Cor 1, 3-4).

E rivâts a chest pont, o podìn cjantâ:

R. Inte cjase dal Signôr par simpri o restarai.

Se cjantât: Il cjant dai salms responsoriâi, p. 78.

Il Signôr al è il gno pastôr:

no mi mancjarà nuie.

Mi fâs polsâ là che i passons a sverdein,

mi mene là ch'a son aghis frescjis.

Al tire sù la mê vite,

in gracie dal so non

mi mene par trois di justizie. **R.**

Ancje s'ò ves di cjaminâ par une foranate scure,
di nissun mâl no varès pôre, parcè che tu mi sês dongje;
il to baston e la tô vuiscje
a son lôr che mi parin. **R.**

Tu prontis denant di me une taulade
presince dai miei nemîs,
il gno cjâf tu âs onzût di vuela
e il gno bocâl al è plen ch'al stranfe. **R.**

Propit, bontât e boncûr mi compagnaràn
ducj i dîs de mê vite,
te cjase dal Signôr
par une vore di agns o restarai. **R.**

SECONDE LETURE

Fil 4,12-14.19-20

O pues dut in chel che mi da la fuerce.

Podessino lis peraulis che cumò o stin scoltant, sedi validis par ognun di nô in chescj moments tant scûrs e problematicis de pandemie.

Chescj versets nus presentin il bon tonificant che o vin dibisugne: O pues dut in chel che mi da la fuerce, compagnât però dal o vês fat ben a spartî.

De letare di san Pauli apuestul ai Filipês

Fradis, o sai jessi te puaretât e o sai ancje jessi te bondance. In ogni moment e in ogni sisteme, o soi stât usât a jessi passût e a patî la fan, a vivi a la grande e a misurâle. O pues dut in chel che mi da la fuerce. Cun dut a chel, o vês fat ben a spartî lis mêis tribulazions. Il gno Diu us darà dut ce che us covente a carat de sô ricjece, in Crist Gjesù. A Diu e Pari nestri glorie tai secui dai secui. Amen.
Peraule di Diu.

CJANT AL VANZELI

cf. Ef 1,17-18

R. Aleluia, aleluia.

Il Pari dal Signôr nestri Gjesù Crist
che nus dedi un spirt di sapience
par che o podin rivâ a capî
cuale ch'è je la sperance de nestre clamade.

R. Aleluia.

VANZELI

Mt 22,1-14

Clamait a gnocis ducj chei ch'o cjararês.

Si nacuarzisi a colp che l'ultim toc de parabule, - Jentrât il re par viodi i gnoçârs - nol cûs cul prin toc. E je une zonte fate pes esigjencis pastorâls de comunitât dal evangjelist.

Il significât al è chest: Nol baste jentra te sale dal ream di Diu, te comunitât cristiane midiant de fede in Gjesù se no si vîf cirint di imitâ la vite di Gjesù.

Al diseve Martin Lutâr che la vieste nuviçâl dal cristian al è il grumâl dal servî; se no si à chel, al è inutil dî: Signôr, Signôr, no vino fat tal to non une vore di miracui? Parcè che: Alore ur al disarai clâr: No us ài mai cognossûts! Lait lontans di me... (cf. Mt 7, 21-23), butaitlu fûr tal scûr.

Dal vanzeli seont Matieu

In chê volte, Gjesù al tornà a fevelâ in parabolis ai soestants dai predis e ai anzians dal popul e al disè: «Il ream dai cîi al è compagn di un re ch'al veve preparât il gustâ nuviçâl par so fi. Al mandà i siei servidôrs a clamâ chei che a jerin stâts invidâts a gnocis; ma chei no volerin savênt di vignî. Al mandà di gnûf altris servidôrs disint: Disê ai invidâts: Ve, o ai preparât il gno gustâ, i miei bûs e i nemâi di grasse a son stâts za copâts e al è dut pront; vignî a gnocis. Ma lôr, cence bacilâ, a lerin cui tai siei cjamps e cui daûr dai siei dafàs. Altris di lôr, brincâts i servidôrs, ju maltratarin e ju coparin.

Il re, disdegnât, al mandà i siei esercits a fruçâ chei sassins e a dâi fûc a la citât. Po ur dîs ai servidôrs: Il gustâ nuviçâl al è pront, ma i invidâts no sal mertavin. Lait alore pes croseris des stradis e clamait a gnocis ducj chei ch'o cjararês. I servidôrs a lerin pes stradis e a tirarin dongje ducj chei ch'a cjararin, bogns e triscj; e cussì la sale si jemplà di gnoçârs.

Jentrât il re par viodi i gnoçârs, s'intivà tun om che nol veve la vieste nuviçâl. I dîs: Amî, cemût mai sêstu jentrât chi dentri cence la vieste nuviçâl? E chel al restà cence peraule. Alore il re ur disè ai siei servidôrs: Peaitlu mans e pîts e butaitlu fûr tal scûr; li al sarà dut un vaî e un crustâ di dincj. Di fat une vore a son clamâts, ma pôcs eletts».

Peraule dal Signôr.

Su lis ufiertis

Acete, Signôr, lis preieris dai fedêi
dutune cu l'ufierte dal sacrifici,
par che, in grazie di chest at di sante religjon,
o podin rivâ a la glorie dal cîl.
Par Crist nestri Signôr.

Antifone a la comunion

Sal 33,11

I grancj a son colâts in miserie e la fan a patissin,
ma chei che si avodin al Signôr no ur mancje propit nuie.

O ben: 1 Zn 3,2

Cuant che il Signôr si pandarà,
nô o sarin sul so stamp,
parcè che lu viodarìn come ch'al è.

Daspò de comunion

O suplichìn umilmentri la tô maiestât, Signôr,
par che tu nus fasis vê part de vite divine
come che tu nus nudrissis cul sant sostentament dal Cuarp e dal Sanc.
Par Crist nestri Signôr.

* * *

Sante messe e Eucaristie, rîts, preieris, cjants: Hosanna pp. 34 - 119.

* * *

I servidôrs a lerin e a tirarin dongje ducj chei ch'a cjatarin, bogns e triscj

Dio lo si incontra. La nostra vita non ci è data come un libretto d'opera in cui c'è tutto scritto, ma è andare, camminare, fare, cercare, vedere... Si deve entrare nell'avventura della ricerca dell'incontro e del lasciarsi cercare e lasciarsi incontrare da Dio. Perché Dio sta prima, Dio sta prima sempre. Lo leggiamo nei profeti.

Dunque, Dio lo si incontra camminando, nel cammino. E a questo punto qualcuno potrebbe dire che questo è relativismo. E' relativismo? Sì, se è inteso male, come una specie di panteismo indistinto. No, se è inteso in senso biblico, per cui Dio è sempre una sorpresa, e dunque non sai mai dove e come lo trovi, non sei tu a fissare i tempi e i luoghi dell'incontro con Lui.

Bisogna dunque, discernere l'incontro. Per questo il discernimento è fondamentale.

Se il cristiano è restaurazionista, legalista, se vuole tutto chiaro e sicuro, allora non trova niente.

La tradizione e la memoria del passato devono aiutarci ad avere il coraggio di aprire nuovi spazi a Dio. Chi oggi cerca sempre soluzioni disciplinari, chi tende in maniera esagerata alla "sicurezza dottrinale", chi cerca ostinatamente di recuperare il passato perduto, ha una visione statica ed involutiva. E in questo modo la fede diventa una ideologia fra le tante.

Io ho una certezza dogmatica: Dio è nella vita di ogni persona, Dio è nella vita di ciascuno. Anche se la vita di una persona è stata un disastro, se è distrutta dai vizi, dalla droga o da qualunque altra cosa, Dio è nella sua vita. Lo si può e lo si deve cercare in ogni vita umana.

Anche se la vita di una persona è un terreno pieno di spine ed erbacce, c'è sempre uno spazio in cui il seme buono può crescere. Bisogna fidarsi di Dio.

Papa Francesco, intervista a S. Marta, 19 agosto 2019

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Par domandâ chescj libris scrîvêt a info@glesiefurlane.org*